

Акафист блаженному Иоанну Босому, Христа ради юродивому

Кондак 1

Избранный чудотворче и изрядный угодниче Христов, Иоанне странниче-земный и к небесем пресельниче, похвальная восписуем ти, собраннии в память твою. Ты же, всем сердцем глагол Божий о любви к ближнему восприявый, и не словом точию, но делом сей исполнивый, научи и нас любви совершенней, да зовем ти: **Р**адуйся, Иоанне, подвижниче Христов предивный.

Икос 1

Ангельски на земли поживый, и в славе Небесней ныне пребываяй, блаженне Иоанне, никакоже оставляеши нас, чад твоих, обаче предстательствуеши о нас, молитвами твоими от бед покрывающе, и ко спасению наставляеши, поющих ти сице:

- **Р**адуйся, яко земная отринул еси; радуйся, яко Небесная восприял еси.
- Радуйся, земный Ангеле; радуйся, человеце Небесный.
- Радуйся, временная преобидевый; радуйся, вечная возлюбивый.
- Радуйся, Лице Божие присно зрящий;
- радуйся, чад твоих на земли николиже оставляющий.
- **Р**адуйся, Иоанне, подвижниче Христов предивный.

Кондак 2

Виде Господь усердие твое ко спасению, воздвиже тя на свещник добродетеля. Ты же, в смирении и кротости пребывый и славу токмо Единому Богу воздавати повелевый, научаеши и нас пети Творцу и Спасителю нашему: **А**ллилуиа.

Икос 2

Разум Божественный взыскал еси, отче Иоанне, темже всем сердцем Господа возлюбил еси, и о исполнении воли Божией возревновал еси. Сего ради слышиши от нас сицевая:

- **Р**адуйся, Предтечи Господню тезоименитый;
- радуйся, Крестителю скорбному житию подражателю.
- Радуйся, глагол Божий приявый;
- радуйся, делом Заповедь исполнивый.
- Радуйся, ближняго, яко самага себе, возлюбивый;
- радуйся, всякому нуждающемуся радостно послуживый.
- Радуйся, храм Божий себе сотворивый;
- радуйся, от храма Божия никогдаже отлучаяйся.
- **Р**адуйся, Иоанне, подвижниче Христов предивный.

Кондак 3

Силою свыше от Господа укрепляемый, летний зной и зимнюю стужу претерпевал еси, босым святыни града Киева обходяй, не имея, где главу подклонити. Времени мину́вшу, в пещеру вселился еси, да в подвизех телесных духом воспеваеши: Аллилуиа.

Икос 3

Имеяй, Иоанне блаженне, небо покров и землю ложе, всякое житейское попечение отложил еси. Нищей же братии, яко Самому Христу, усердно послужил еси. Сего ради слышиши от нас сицевая:

- Радуйся, одетый во вся оружия Божия;
- радуйся, ставый противу козней диавольских.
- Радуйся, препоясавый чресла твоя истиною;
- радуйся, одетый в броню правды.
- Радуйся, восприимый щит веры;
- радуйся, мечем слова Божия всяку злобу разрушивый.
- Радуйся, босыми ногами по земли походивый;
- радуйся, обувый нозе во уготование благовествования мира.
- Радуйся, Иоанне, подвижниче Христов предивный.

Кондак 4

Бурю страстей силою Божиею превозмогл еси, странниче предивный, незлобием и кротостию суету мира победил еси, обаче победная от Господа приёмый, всяко помогал еси немощным, да и тии с тобой воспевают Промыслителю Богу: Аллилуиа.

Икос 4

Слышаша ближнии и дальнии о житии твоём, и благодатная дарования души твоя видяще, яко не токмо сам спасаешися, но и ближним служиши всеми силами твоими, потщашася воспети тебе:

- Радуйся, нестяжанием душу очистивый;
- радуйся, смирением крайним украшенный.
- Радуйся, славою от Христа увенчанный;
- радуйся, святость жития покровом юродства сокрытии тщавыйся.
- Радуйся, на ниве Христовой делателю прилежный;
- радуйся, слезами землю сердца твоего оросивый обильно.
- Радуйся, данный тебе Богом талант умноживый;
- радуйся, плод стори́чный Господеви твоему принесый.
- Радуйся, Иоанне, подвижниче Христов предивный.

Кондак 5

Боготечною звездою явился еси, святе Иоанне, над горами Киевскими светом святым возсиявшею, и мрак грехов разгоняющею. Мы же, чада твоя, любовию прославляем Бога, даровавшаго тебе таковыя дарования, поя Ему: Аллилуиа.

Икос 5

Виде благочестивец некий житие твое, даде тебе обиталище, идеже бы ты не токмо сам вселиться возмогл, но и нищим послужити потщался бы. Ты же от дне того сугубыя подвиги служения ближним подъял еси, подвизая нас пети тебе:

- Радуйся, благих дел о Господе светильниче;
- радуйся, истинныя любви к ближнему учителю.
- Радуйся, церкви Десятинныя украшение;
- радуйся, яко от храма и по смерти не отлучаешься.
- Радуйся, в храм от Небесныя славы пришедый;
- радуйся, молитвами твоими богомольцев присный защитниче.
- Радуйся, исправителю злых нравов;
- радуйся, насадителю добра и праведности.
- Радуйся, Иоанне, подвижниче Христов предивный.

Кондак 6

Проповедуют нищия и больныя труды и подвиги твоя, блаженне, яко под кров твой собирал еси бездомных, алчущих питал еси, немощным служил еси в болезнях, всех же на путь спасения наставлял еси. Темже всяк, от тебе вспоможение приявый, в радости Богу воспевае: Аллилуиа.

Икос 6

Возсия свет разумения Божественнаго в сердце твоем, Иоанне праведне, сего ради неведомых ты именовал еси, будущая яко настоящая провещавал еси, грешников ко спасению призывал еси. Мы же, во мраце греховнем блуждающии, воспеваем тебе:

- Радуйся, светом Христовым просвещенный;
- радуйся, верных сиянием святости просвещаяй.
- Радуйся, мрака жития разгонителю;
- радуйся, истинный просветителю душ.
- Радуйся, во свете лица Божия житие прешедый;
- радуйся, сладчайшего Иисуса на Небесех зряй.
- Радуйся, светлым умом волю Божию уведевый;
- радуйся, и нам, грешным, боговедения учителю.
- Радуйся, Иоанне, подвижниче Христов предивный.

Кондак 7

Хотяй всемерно Господеви угодити, Иоанне славный, странноприимницу сотворил еси при храме святого апостола Андрея, да вси страждущии упокоение в Бозе обретут, поя Ему: Аллилуиа.

Икос 7

Новыя люди Господеви сочетал еси, блаженне Иоанне, являя всем образ истиннаго благочестия. Тако и боголюбец некий Дамиан, добродетелем от тебе научився, Богови всего себе повинув и в монашестве Вонифатием наречен быв, ста добрый пастырь инокующим и всем нуждающимся усердный помощник. Мы же, таковая славная видяще, поем:

- **Р**адуйся, добродетельному житию научивыйся;
- радуйся, боголюбцев житием своим научивый.
- Радуйся, мудрость Божественную обретый;
- радуйся, яко учитель ищущим спасения явивыйся.
- Радуйся, Единого Бога благий рабе;
- радуйся, рабов Божиих усерднейший служителю.
- Радуйся, райское благоухание добродетели;
- радуйся, святости божественная светлосте.
- **Р**адуйся, Иоанне, подвижниче Христов предивный.

Кондак 8

Странное и неизреченное видим о тебе, Иоанне праведне: грамоты не ведый, книги для молитвы употреблял еси; ничтоже имый, многия люди богатыл еси; немощен сый, к тебе приходящим помощник был еси. Сего ради вопием Подателю чудес Богу: Аллилуиа.

Икос 8

Весь любовию Христовою горяй, Иоанне святе, не себе угождал еси, обаче ближним служил еси в нуждах телесных и духовных. Все же, от тебе помощь получившии, согласно поют тако:

- **Р**адуйся, тело свое веригами удручивый;
- радуйся, дух твое молитвою к Богу вознесый.
- Радуйся, о себе небрегый Господа ради;
- радуйся, о ближних пекийся ради Христа.
- Радуйся, людем будущая провещавый;
- радуйся, к вечности всех зовый.
- Радуйся, тесным путем в Царство вшедый;
- радуйся, от Царя Христа увенчанный.
- **Р**адуйся, Иоанне, подвижниче Христов предивный.

Кондак 9

Вси верни удивишася преславному преставлению твоему, блаженне Иоанне. И нена́стие оты́де, солнцу возсиявшу, егда ты, по причастии Святых Таин, дух твой предал еси Богу, Емуже во всем житии твоём воспевал еси неустанно: **Аллилуиа.**

Икос 9

Ветія многовещáнная не дово́льни суть изъяснити, како мертвое тело твое, святе Иоанне, в тепле месте лежаще, тления не увиде. Мы же, дивному действию Божию дивящеся, поем ти:

- **Р**адуйся, тления греховнаго избегший;
- радуйся, по смерти нетленен пребывый.
- Радуйся, Ангелов блаженным преставлением твоим возвеселивый;
- радуйся, яко слезы нищих, о тебе рыдающих, осушил еси.
- Радуйся, от земных к небесным радостно прешедый;
- радуйся, от небесная славы на чада твоя призираый.
- Радуйся, Милостивому Богу послуживый;
- радуйся, милости Божия на нас изливаяй.
- **Р**áдуйся, Иоáнне, подви́жнице Христóв предíвный.

Кондак 10

Спасти́ хотя душу твою, о теле небрегл еси, свѣтче Божий. Темже, плоть духови покорил еси воистинну, подвигом смирение растворив, в радости выну воспевал еси Богу: **Аллилуиа.**

Икос 10

Стена еси твёрда и прибежище был еси всем нуждающимся, Иоанне милостивый и щедрый. Темже и мы, обременении грехми́ многими, притекаем к тебе, просяще твоего заступления и воспевающее тако:

- **Р**адуйся, преподобных Феóфила и Парфёния праведный современниче;
- радуйся, добродетелем святых всеусердный подражателю.
- Радуйся, начальствующих к доброделанию подвигнувый;
- радуйся, богатых к нищелюбию обративый.
- Радуйся, немёрных умирíтелю;
- радуйся, пламень злобы молитвами угасивый.
- Радуйся, в знóи греха сущим сéне, Богом зданная;
- радуйся, жаждущим спасения источниче неиссякаемый.
- **Р**áдуйся, Иоáнне, подви́жнице Христóв предíвный.

Кондак 11

Пение всеумиленное слышиши, блаженне, на месте погребения твоего. Си бо, от Господа твоими молитвами помощь и исцеление получившии, в радости духа воспевают Единому Щедрому Богу: Аллилуиа.

Икос 11

Светом Божественным возсиял еси, Иоанне, и яко некий светильник много-светлый на горах Киевских пребыл еси, мрак греховный просвещающе. Темже и мы, чада твоя, тепле тебе воспеваем:

- Радуйся, апостолов сонаследниче; радуйся, мучеников сподвижниче.
- Радуйся, преподобных сомолитвенниче;
- радуйся, праведных сопричастниче.
- Радуйся, добродетелей Евангельских исполнителю;
- радуйся, всякаго добра взыскателю.
- Радуйся, любовию Божией озаряяй сердца;
- радуйся, к любви подвизаяй всякаго, тебе молящагося.
- Рáдуйся, Иоáнне, подви́жниче Христóв предíвный.

Кондак 12

Благодать от Бога дадётся ти, блаженне, недужныя исцеляти, бедствующия утешати, глáдныя питати, всем же верным быти образ словом и житием, да всяк земнородный в горняя устремляется, научаяся Богови пети: Аллилуиа.

Икос 12

Поюще многия подвиги твоя, воспеваем добродетельное и смиренномудренное житие твое, блаженне Иоанне, славим дела любви, яже к Богу и ближним твоим, почитаем странное твое пребывание, и умиленно поем ти:

- Радуйся, присно моляйся о спасении нашем;
- радуйся, от храма Десятиннаго не отлучáйся.
- Радуйся, явлéнии твоими чада твоя утешаяй;
- радуйся, предстательством твоим тебе молящяся спасааяй.
- Радуйся, красото Киевских святых;
- радуйся, диадимы церковныя каменю драгий.
- Радуйся, услышателю прошений;
- радуйся, исполнителю яже ко спасению молений.
- Рáдуйся, Иоáнне, подви́жниче Христóв предíвный.

Кондак 13

О, преславный угодниче Христов, блаженне Иоанне! Ныне собраннии Господа ради в память твою, почитаем Единого Истинного Бога, даровавшего нам тебе сицевáго заступника, молитвенника и помощника. Темже просим, да сподобит Спаситель и нас, молитвами угодника Своего Иоанна, предстояти пред светлым Лицем Божиим, выну воспевающе: Аллилуиа.

**Сей кондак глаголи трижды.
Таже икос 1, и кондак 1.**

Молитва Иоанну Босому

О блаженне отче Иоанне, верный рабе Христа Бога и всем страждущим скорый помощниче! Ты небеснаго отечества взыскупа, дом и вся сродники твоя оставил еси, хлад и зной претерпевая, плоть свою постом и нищетою смиряя, дар любви и прозорливости стяжал еси.

Услыши нас, многогрешных, ныне к тебе вопиющих, и молитвами твоими исцели всяк недуг душ и телес наших, защити нас от враг видимых и невидимых, сподоби нас течение жизни сея непреткновенно прейти, христианскую непостыдную кончину нам у Господа испроси и Небесное Царствие унаследовати сподоби.

Молим тя, отче блаженне, обрати сердца наша к любви нелицемерней и истинному благотворению, [*аще во обители Десятинней:* и испроси у Господа Возсияти якоже прежде детищу святаго равноапостольного князя Владимира, храму Десятинному в честь Пресвятой Владычицы нашей Богородицы и Приснодевы Марии, идеже ты во время земного жития твоего молился еси], наипаче помози воздвигнути святыя храмы в душах наших и добродетельми их украсить, да купно с тобою прославим Святую Троицу, Отца и Сына и Святаго Духа во веки веков. Аминь.

Тропарь, глас 1

Яко бисер безценный явился еси на горах Киевских, блаженне отче Иоанне, нестяжанием и нищелюбием Бога прославив, и дар любви нелицемерныя взыскав. Темже по смерти благодать исцелений приял еси. Моли Христа Бога спастися душам нашим.

Кондак, глас 8

Суетная мира презрев, Христа ради юродство избрал еси, блаженне, присно в подвизах пребывая и нищим питатель быв. Темже дары Духа Святаго приял еси обильно, отче наш Иоанне, молитвенниче неусыпный о всех верою почитающих тя.